



Sabtu, 16 September 2023

**Ogen: Perbahanen Rasul 16:15a**



*Iperidiken Se Isi Jabu*



**B**uah kiniteken man Dibata, Lidia mabai se isi jabuna iperidiken. Mbages kal pengangkanna kerna Kata Dibata si ituriken Paulus man bana. Mis kal itadingkenna pengangkanna si ndekah kerna pengajaren agama Jahudi. Kenca itandaina Jesus selaku Juru selamatna, ibababaina pe se isi jabuna gelah selamat. Salah sada tanda keselamatan e me iperidiken.

Rikutken pengajaren gerejanta pe maka peridin e me simbol kita mate i bas Krsitus janah keke i bas Kristus. Kita mate erkiteken dosa-dosanta tapi kita itebus Tuhan Jesus i bas kuasa dosa nari. Dosa lanai erkuasa i bas geluhta, Jesus si enggo engkuasai kita. I bas kuasaNa, kita ipekeke i bas si mate nari. I bas lakon peridin si badia si ipake kita simbolna lau . Ertina, lau e me si mbersihkan kerina kulanta. Labo terjeng si melket si arah darat e ngenca ibersihkan tapi dosa i bas pusuh pe isasapken. Lau e pe simbol kegeluhen. Jadi kalak si iperidiken ngaluken kegeluhen i bas Tuhan Jesus nari. Kegeluhen si la erkeri-kerin, em rusur si ibelasken kita keselamatan. Peridin e pe jadi simbol pertobatan. Erkiteken dosanta enggo ialemi ras enggo ngaloken keselamatan, bujur me kita ngadi ngelakoken dosa. Janah kita atan erberita kerna perbahanen Dibata si mbelin e ku sekelewetta gelah kerina ngaloken keselamatan e.

Bage me perbahanen Lidia nandangi se isi jabuna, iturikenna perbahanen Jesus, si nggit ngamburken darehNa guna nebusi dosana, erkiteken si e kerina min ngikutken Jesus e ras jadi sekerajangen Jesus rasa lalap. Kiniteken Lidia e jadi usihen min man banta. La dirina ngenca iukurina, la cukup terjeng ia saja erkiniteken. Ibabaina se isi jabuna erkiniteken. Tuhu la ituriken ise saja se isi jabuna e, tapi selaku perbinaga tentu lit nge si nampati ia i bas ndahiken dahinna si teptep wari. Banci saja man si erdahinna pe kerina iturikenna ras iababaina ngikutken Kristus.